

**Suliffeqarfinnik sorlernik namminersortunngorsaanissamut kaammattuinnissaq siunertaralugu Naalakkersuisut namminersortunngorsaanissamut ataatsimiititaliamik, ingerlatseqatigiiffinnik Namminersornerullutik Oqartussanit tamakkiisumik ilaannakortumillu pigineqartunik misissueqqissaartussamik, pilersitseqqunissaannut Inatsisartut aalajangiiffissaattut siunnersuut. Misissueqqissaagaq UKA 2017-imi Inatsisartunut saqqummiunneqassaaq. (Demokraatit Inatsisartuniitsitaat)**

### **Akissuteqaat**

(Naalakkersuisut Siulittaasuat)

### **Aappassaanneerpeqarnera**

Namminersortunngorsaanissamut ataatsimiititaliamik pilersitsinissaq pillugu Demokraatit aalajangiissutissat siunnersuutaat pillugu ataatsimiititaliap isumaliutissiissutaa pillugu Naalakkersuisut Inatsisartuni Inuussutissarsiornermut Ataatsimiititaliaq qujaffigerusuppaat. Naalakkersuisut allannguutissatut siunnersuutaat Inuussutissarsiornermut Ataatsimiititaliap akuerisassanngorlugu isumaqatigiissutigisimagaat Naalakkersuisut maluginiarpaat.

Naalakkersuisut eqqarsaatersuutaat siullermeerinninnermi saqqummiunneqarsimasut pillugit Ataatsimiititaliap oqaaseqaatini eqqarsaatersuuteqarsimanera Naalakkersuisut soorunami nuannaarutigaa. Ingerlatseqatigiiffinnik Namminersornerullutik Oqartussanit pigineqartunik namminersortunngorsaanermi pisuni tamani mianersoqqissaarnissaq pisariaqartoq, kiisalu niuernermit piunasaqaatit ingerlatseqatigiiffinnut atuuttut naapertorlugit ingerlatseqatigiiffiit immikkoortiternissaat pingaaruteqartoq, ilaatigut isumaqatigiissutigineqarpoq.

Aalajangiissutissatut siunnersuutip siullermeerneqarnerani partiit oqaaseqaataat kiisalu ataatsimiititaliap isumaliutissiissutaanni oqaaseqaatit tunngavigalugit Naalakkersuisut allannguutissatut siunnersuutaanni ingerlatseqatigiiffiit Namminersornerullutik Oqartussanit pigineqartut namminersortunngorsinnaanerannut periarfissat pillugit paasissutissiissutigilluarneqarnissaannik kissaat piviusunngortinneqarsinnaagaluartoq Naalakkersuisut isumaqarput.

Naalakkersuisut 2018-imi upernaakkut ataatsimiinnermi Inatsisartunut nassuiaammik saqqummiussissasut Naalakkersuisut allannguutissatut siunnersuutaanni allassimavoq. Nassuiaatip aningaasaliissutit sippornagit suliarineqarnissaa Naalakkersuisut anguniassavaat.

Naalakkersuisut aalajangiiffigisassatut siunnersuummi Inuussutissarsiornermut Ataatsimiititaliap oqaaseqaataannut saqqummiunneqarsimasumut allanik oqaaseqaatissaqanngillat, taamaattorli Inatsisartut suliamik suliaqarnissaannut naalakkersuisut qilanaarput.